



重修廣平府志卷六十

附傳

藝術

仙釋

雜流

漢

李梵清河人以治歷名章帝時與編詵等奉勅總校三

統歷

漢書

北魏

趙法逞清河人顯祖高祖時以占卜知名魏道虔清河

人長於陰陽卜筮之術肅宗時為奉車都尉又清河張

御以占相之術名

魏書

趙約清河人嘗從東武城崔彧學以醫術知名又李潭

清河人太宗時以善鍼著

北史

北齊

宋景業廣宗人也明周易爲陰陽緯候之學兼明歷數
魏末任北平太守顯祖作相在晉陽景業因高德政上
言易稽覽圖曰鼎五月聖人君天與延年齒東北水中
庶人王高得之謹案東北水謂渤海也高得之明高氏
得天下也時魏武定八年五月也高德政徐之才並勸
文宣應天受禪乃之鄴至平城都諸大臣沮計將還賀
拔仁等又云宋景業誤王宜斬之以謝天下帝曰宋景
業當爲帝王師何可殺也還至并顯祖令景業筮遇乾

之鼎景業曰乾爲君天也易曰時乘六龍以御天鼎五月卦也宜以仲夏吉辰御天受禪或曰陰陽書五月不可入官犯之卒於其位景業曰此乃大吉王爲天子無復下期豈得不終於其位帝大悅天保初封長城縣子受詔撰天保歷李廣爲之序

齊書參北史

隋

劉孝孫廣平人開皇時與張孟賓同知歷事

北史

唐

宋俠洛州清漳人北齊東平王文學教正之子也以醫術著名官至朝散大夫藥藏監撰經心錄十卷行於代

書

高正臣廣平人襄州刺史衛尉卿習右軍書法睿宗最

愛其筆

全唐詩小傳

五代

劉叟成安人後唐莊宗敬皇后父黃鬚善醫卜自號劉

山人

五代史唐家人傳

金

李慶嗣洺州人少舉進士不第棄而學醫讀素問諸書洞曉其義天德間歲大疫慶嗣攜藥與米分遺貧民全活甚衆年八十無疾而終所著有傷寒纂要及傷寒論

鍼經等書

明一統志

元

趙世英字唐臣永年人父慶祥世以星厯名家英學尤出諸父右嘗以自黃帝堯舜三代而後秦火之餘遺文殘缺漢興師法多門惟太初四分皇極大衍欽天爲最密然數一而所祖各別深心研考彌不精究其極

舊志

孫德芳永年人幼篤學長師谷氏學按摩科延祐初舉

爲太醫

同上

明

蕭廷龍雞澤人精醫術邑某患脣瘡漸不能飲食廷龍

曰瘡生脣上甚險然不治且死吾爲汝移之下部當作
七顆則易爲力矣遂飲以藥旬日間脣漸痊而股下果
起七瘡如脣上形鍼之不數日愈又濟南德藩世子項
下陡起一粒惟患癢御醫進以苦寒藥徧身暴腫譖語
不止廷龍於喉處刺一針出膿血數斗愈其奇驗類此
子良臣傳父業亦有神效

雞澤縣志

申任字小石永年人幼習儒業後學醫活人無算邑人
稱爲醫聖子炳庠生得父術精診視務中竅要嘗曰射
覆以視病鹵莽以投藥直以人命戲耳炳沒人多思之

永年

縣志

胡鯉字上池永年人尙書瓚從元孫幼敏悟好醫術多
讀方書遇農人某於途訝其色診之曰明日當死已果
然族有婦暴死鯉診之曰當產血迷非死也且生男使
人撬其齒灌藥而活果生男嘗於中表家治病有李氏
子方陪鯉談笑鯉屬其治後事七日當死屆期果驗李
參政承蜩爲諸生時赴京兆試鯉偶診之曰至趙州疾
當作逾試期乃愈竟如鯉言饒陽路吏部名區病痢二
年鯉診之腸癰也不欲面媿諸醫暗投腸癰之劑遂愈
諸醫皆感服旂校張琦妻病鯉曰胎爲藥誤死腹中左
背爛矣投之藥果下男胎而左背爛婦無恙鯉所治皆

應手活其不可爲者終不投藥從學醫者至百餘人莫能得其術子福宏兵部主事烈宏歲貢生禧宏舉人孫芝發順治三年進士

永年志

國朝

冀棟字任中永年人工部尙書如錫子康熙五十四年與弟渠同榜成進士改翰林院庶吉士渠字絜中職授內閣中書渠不樂仕宦在籍修理先塋訓課後裔棟仕宦二十餘年官至左副都御史以直節稱兼通醫術棟娶魏氏柏鄉魏相國裔介次女一日柏鄉有婦人因生產未下暴死將入歛棟往視之見其血痕曰此活人也

特兒以手持母心耳以鍼投之死者復甦嬰兒亦得生
產無害棟在京都一日偶出有人自言不時腹痛跪請
治病棟顧視良久曰腹中有蟲故也使服信若干便愈
其人以爲毒物不敢多服僅服少許便止而病亦未愈
他日又求棟治棟曰汝病必死使汝服信若干非毒汝
也毒腹蟲耳乘蟲首上仰以信投之蟲當盡死今汝服
信太少蟲多未死再投以信蟲首不仰矣故不可治也
其人果死時赴

大內治病無不神效

特賞加二品頂戴並

恩賜福字蟒服兼理太醫院事年六十餘以疾卒子方焟方然

俱舉人所著有傷寒論等篇

採訪冊

冀璲字長石邯鄲人聰穎能文工書法出入於褚河南
米襄陽間而自爲一體家臨滏水求書者趾相錯性顧
簡傲其有不可卽當路貴人資金帛來輒麾使去曰昔
陶淵明不爲五斗米折腰吾豈肯以阿堵物役吾腕邪
作七言小詩楚楚有致年三十二卒

鄭方坤撰傳

趙廷棟字玉材磁州人官四川天全州州判善青烏術

著有陽宅三要地理五訣行世

磁州志

劉數窩永年監生善岐黃術雍正十一年御史評圖病

膈危甚延數窩至一藥而愈著有胎產須知救急良方等書同邑張希載善治痘疹著有痘疹精要集

永年志

王葆中字精一雞澤人爲諸生時通小學性理諸書年四十學醫一以診脈爲主病者至不令言症診其脈卽知症之所患一一相符遠近求醫者踵相接同縣李崇禮武生亦能醫尤長瘡科瘟疫乾隆丙午疫氣傳染崇禮所活不下千餘人

王鍾信年譜

王廷樞字貫仲廣平歲貢生性嗜書以崔段垣所著豐考功筆訣爲法撫摩聖教序四十餘年得其奧妙名噪

一時

採訪冊

王至字仰亭廣平增廣生家庭族黨雍睦無間言能詩善畫至今單詞隻字識者以爲吉光片羽

同上

趙文廣平人精醫術善治咽喉症本邑及鄰邑染是病者應手立愈保全甚衆從不受饋儀

同上

李成棟字建功廣平歲貢生性孝友中年後以岐黃術名全活甚衆不受饋贈遠近求診視者接踵於門邑令

李象九雅重之

同上

張玉輔字蘊齋磁州廩生和平樂易精岐黃以術濟人

貧富均不受謝

磁州志

宋桂林清河人道光辛卯武舉署通州馬駒橋千總才

藝過人刀法稱最人呼爲花刀公子尤善丹青

清河志

郭邁倫清河增生博覽羣書兼習醫術非洞悉病源不

輕療治慎取與一介不苟又張夢麟清河廩貢生亦以

能醫名庠生莊慎修增生許潔銘皆以善痘疹著名

同上

薛士傑肥鄉人庠生博聞強記又精醫術又高凌雲恩

貢生有學行長醫術求方者戶外履常滿

肥鄉志

徐雋甲威縣武庠生性溫和拳勇卜筮堪輿悉精通又

徐如松字茂遠業岐黃尤精於瘟疫所活多人四方感

之

採訪冊

李世馨字詒齋永年歲貢生性聰敏工小楷人多珍之

長子經綸庠生字亦畚事親孝持躬端正精種痘術每
歲施種活人無算次承綸舉人曾綸兆綸皆庠生

縣志
參採

訪冊

邢宗周字蓮溪永年人業醫濟人輸財立惜字社年六
十六歲始有子鄰人以一鄉善士額其門卒年八十七

採訪

冊

謝廷芳字蘭圃永年人幼習醫精脉理心存利濟名噪
一時活人無算知府楊兆璜以仙手佛心表其閭

馮國琮字妙器永年人善醫術得外科真傳遠邇就治
者踵相接施藥濟人不問其姓字里居或有以厚資酬

者卻弗受

孫泰字盛時永年人幼習醫學諸書專心研究藝漸精粹療治傷寒尤所擅長著有瘟疫傷寒辨

杜天成字懿德少業儒家貧從父國士學醫精脉理道光壬寅疫大作施藥濟人著有集驗良方脉案等書

饒大源字泉亭永年附貢生成豐中署深州訓導精醫術遇奇難之症衆人束手者大源一藥卽愈子樹滋官杞縣典史亦能承其家傳又有劉純字還古永年諸生性耿介棄儒學醫尤善鍼灸

俱同上

胡大中字致堂永年人幼通醫學得同邑饒大源指授

術益精痘疹傷寒兩門爲當時所推重同治光緒間旱災之後瘟疫流行一家中至走避不相省視大中救之惟恐不及途遇病者卽醫之日走數十家未嘗有倦色療重大疑難之症歸必書其病勢原委用藥次第分門詳註名曰臨症方脈論

張之萬撰墓誌銘

以上藝術

周

琴高趙人以鼓琴爲宋康王舍人行涓彭之術浮游涿郡間二百餘年後辭入涿水中取龍子與弟子期之日皆潔齋候於水旁設祠屋果乘赤鯉坐祠中且有萬人

觀之留月餘復入水去

列仙傳

晉

王烈字長休邯鄲人服黃精松花老而更少行步若飛
嵇康甚重之數數就學烈後獨入太行山東北如雷聲
往視山上破數百丈石孔徑尺中有青泥出取搏之隨
堅凝氣味如粳飯烈自食數丸更攜以遺康康取觀之
已成石擊之錚錚然烈又入河東抱犢山見一石室室
中有架架上有素書二卷莫識其字暗記數十字以示
康康盡識之烈喜乃與康共往讀至其所已失石室矣
按神仙經云神山五百年一開中流石髓得而服之壽